



# 自序

傷寒之病千變萬化而不可窮然其所以爲病者足六經而已以六經之簡持千變萬化之繁雖其變幻至於不可測知而終莫能遁乎吾所以持之者之外仲聖著傷寒論立方無多而論者謂苟精求其理變而通之則豈唯治傷寒舉天下之病亦無不可治豈非以其一經病有治一經之法兩經兼病或此經傳彼經則又各有其治之之法有條不紊門戶固粲然歟後人釋傷寒一書充棟汗牛而元劉君守真分經一書獨以六經爲之綱而條舉脈象病情及所以治之之方藥列於下某病之何以應屬某經某方之何以能治某病及夫疑似之際莫不擘肌分理疏通而證明之蓋仲聖之書得劉氏而大明而世之治仲聖之書者亦得劉氏而後有所從入譬諸儒家之學則宋五子之疇也今世醫學日衰於傷寒論旣以其古奧而置之卽劉氏此書亦畏厭其繁而束之高閣然則病者將何所託命而茲道不幾乎熄歟藥聞 謹陋

幼卽喜治方書竊以爲治病矣而不知病在何經知在何經矣而不知何經之當用

何藥前者爲不識病後者爲藥不應病其做皆足以殺人視之茫然而行之鹵莽誠可畏也劉氏一書實爲習傷寒之階梯爰於暇日依原書篇次一一貫串爲之說明文之繁者約之詞之深者淺之幾歷寒暑乃克告成庶幾閱者樂其簡易一開卷而瞭如雖識渺學微尙萬萬不足以窺劉氏之門庭何況臻仲聖之堂奧第使於斯道小有裨益則雖以蠡測海不敢辭也其春溫夏熱秋燥三篇劉氏意以補傷寒之未備今距漢千數百年天時地氣與人之體質皆不無略異若必爲之一一推合恐宜於古者不宜於今故是篇遂付闕如易曰神而明之存乎其人觀此則知劉氏衍仲聖之緒有以達仲聖之權於是可得讀仲聖書之法並可以得讀劉氏書之法而所謂通傷寒一書可以治天下之病者其理亦益明區區述是書之意蓋在於此云

丙子秋杪藥閒自識

傷寒六經明義目錄

卷全

傷寒太陽經上篇

傷寒太陽經中篇

傷寒太陽經下篇

傷寒陽明經上篇

傷寒陽明經中篇

傷寒陽明經下篇

傷寒少陽經全篇

傷寒太陰經全篇

傷寒少陰經前篇

傷寒少陰經後篇

傷寒厥陰經全篇

或頭項強痛等此不可用傳經之藥以及汗下之法仍與桂枝湯以和解則愈  
桂枝證時發熱有時不熱汗出而不愈無他病者此爲衛氣盛不與營分和諧當其  
未發熱時仍用桂枝以和解少汗則愈

膀胱爲足太陽之經太陽陽也其證欲解時從己至未以逢其旺也大抵逢生則吉  
逢剋則凶凡病皆然不獨傷寒

太陽經病至六七日而退以陰陽之數盡病亦稍衰此不傳經而知其必愈也

傷寒者不可與桂枝湯以桂枝第能解肌不能直入營分且芍藥酸收入陰恐寒邪  
因此留戀而不出則病勢加增

素有溼熱者不可與桂枝湯桂枝性熱以熱投熱是謂火上加油犯此者必吐膿血  
酒客亦宜禁之以酒爲溼熱之物也

桂枝證辨其有無裏證須於小便赤不赤以及心煩與否辨之

桂枝證外現惡寒發熱頭痛汗出等表證又復小便短赤此爲表邪未解而裏證又

急宜兩解表裏五苓散桂枝 猪苓 茯苓 白朮 澤瀉主之

桂枝證發熱而煩渴有表裏證飲水則吐者名爲水逆兩解表裏爲宜五苓散主之此本有水飲者也裏熱甚則能消水水入則不吐裏熱少則不能消水停積不散飲而吐水也以其因水而逆故名水逆此條雖與前條病情不同而其表裏俱病則一故亦以五苓散和表裏散停飲

桂枝證不解肌誤用灸法強逼其汗而汗不出以致熱灼於裏則身必發黃然若但陽邪盛於上而衄血者其熱亦隨衄血而解仍是陽分爲病若陽邪侵入陰分熬煎於內津液枯槁而小便難則爲難治之證矣

津液之存亡以小便之利否辨之陰氣未盡小便必通是氣已盡小便全無此不易之理也若陽邪第盛於上頭汗出至頸而還是陰氣欲絕不能下達與陽虛頭汗者不同且腹爲之滿氣爲之喘口乾咽爛大便不通甚至循衣摸牀熱勢極盛亦云險矣幸而小便仍通陰氣未盡如是者猶可以設法治之



桂枝證誤用鍼灸以致引邪深入陰分其人必躁然熱邪在裏勢必奔迫大腸而便膿血此非血之爲病熱迫之使然宜清熱解邪熱清則膿血自止否則雖求其止終無止期矣

鍼灸之法施於津液足之人尙不至於大變若施於津液不足之人則有傷陰之慮須戒之

桂枝證誤用鍼灸法復感風寒寒從核起甚至氣動自臍下上升宜桂枝加桂湯腎氣奔豚必氣自臍下上衝心胸如有一段硬物阻塞又其行動必不便似有筋牽掣方是奔豚否則爲胃氣痛矣

桂枝證誤汗後以致頭痛心下悸身暈動大汗淋漓有亡陽之慮重則真武湯附子白朮 茯苓 白芍 生薑 輕則桂枝加附湯以表虛不得不用附朮以固表以衛病

不得不用芍藥以守內甚至手足厥逆則必急回其陽又非四逆湯附子 乾薑

灸草 不可



桂枝證誤汗後又復感外風是謂風漏以致身暈動外若無所護者仍宜真武湯及桂枝加附湯以固陽

桂枝證誤服汗藥但得大汗未至亡陽及風漏之證並無他變證者仍與桂枝湯和解以發汗有動乎營與衛無涉終是衛病不得不仍治衛

桂枝證解肌後外邪已除但胃氣未和或時有吐逆者和其胃則愈

桂枝證不解肌以吐藥強逼其汗雖吐藥有發散之意不知吐後有傷脾胃從前寸上浮緩之脈不見獨關上現虛數之脈名曰小逆宜兼調脾胃人以胃氣為主胃氣不和卒難平復急宜治之若本惡寒發熱自服吐藥後反惡熱不欲近衣此第傷胃陰之所致宜清養胃陰不比脾胃俱傷之爲難治也

桂枝證誤下後胸中痞滿鬱悶不舒此爲痞證瀉心湯主之若內有停飲挾陰邪上逆嘔吐者宜半夏瀉心湯半夏 黃芩 黃連 炙草 乾薑 人參 大棗以滌飲若因於

中虛者則宜坐鎮中州甘草瀉心湯主之即半夏瀉心湯去人參而倍用甘草乾

薑也

痞證爲傷寒誤下後之證中風者間亦有之何以知痞病多爲傷寒誤下之證以其本傷於寒而復下以苦寒之藥胸中盡是一團陰霾之氣欲不痞得乎又滿證忌甘而反重用甘草者所謂塞因塞用亦不得泥於滿證忌甘之一說也

桂枝證誤下後表邪有入裏之勢又欲留戀於外不能直驅入裏但覺心下滿痛拒

按痰多脈浮滑者宜小陷胸湯 半夏 黃連 括蕪 驅熱散結不可急下若心下至

少腹結痛煩躁不寧小有潮熱宜大陷胸湯 大黃 芒硝 甘遂 下之以保津液若

恐其過而不留即用大陷胸丸 即大陷胸湯加杏仁葶藶以瀉肺加白蜜以留戀而潤導之 古

人製方之意微妙入神必好學深思庶幾近之

結胸證須辨其脈脈浮者不可下脈微而沉者下之宜緩脈沉而急者方宜峻下不可鹵莽行事是在臨時酌之若結胸證已具而又煩躁者是陰氣已絕胃氣有立亡之勢即不下亦死不可不知

桂枝證表證未解而數下之遂協熱而下利不止正虛邪實中成窒礙以至心下痞滿此上下交爭中氣有立絕之勢此時欲解表裏之邪全賴中氣爲之敷布宜解表兼和中桂枝人參湯桂枝 人參 乾薑 白朮 炙草主之

此方專主開痞痞者皆因下藥傷陽胸中阻塞服此藥後腹中響若奔雷而痞氣開利自止若以協熱而用清熱之品則殆矣

桂枝證誤下後引邪入裏遂協熱而下利不止此表未解而裏邪已急浮緩之脈必變爲急促爲太陽之邪未入陽明之經先入陽明之府兩解表裏之法爲宜葛根黃芩黃連湯主之

此條係爲邪盛而設與上條下後涉於虛者不同臨證時不可不辨

桂枝證誤下後無他變證但表邪未解胸滿脈促仍宜桂枝湯以和解但須去芍藥以下後有傷乎陰恐芍藥引邪入裏故也若脈促胸滿又微惡寒者是陽虛之候桂枝加附湯主之

桂枝證誤下後無他變證但小便不利者不可妄投湯藥須俟其津回而小便自通此下後傷津所以小便不利也

桂枝證誤服下藥無胸滿等證其氣有時上衝是謂邪還於表仍與桂枝湯以和解若素來氣盛時上逆者再加厚朴杏仁以降逆解肌後如有裏證者仍再用前下藥卽以桂枝大黃湯兩解之使上下分解其邪是或一道

桂枝證未解雖內有心煩胸脅痛少腹急結小便自利其人如狂之蓄血證當先解表然後乃可攻裏若遺其表但攻其裏用抵當湯水蛭 桃仁 蟅蟲 大黃以下之則外邪內入外邪一日不盡血一日不止故有表證者皆須先解表

膀胱蓄血一證須於小便之利否辨之小便利則膀胱之氣化可知也其少腹急結非蓄血而何

桂枝證未解熱結膀胱其人如狂自下血者愈

自下血者邪已內解故知其必愈與上條以行血藥攻之有異

桂枝證未解而脈反沉結小腹急結者似爲蓄血之證若又小便不利不可誤認爲血瘀允爲發黃之候

發黃一證前十數條云誤用灸法熱灼於裏所致此則小便不利爲膀胱之氣不化雖同一裏證而病情不同

桂枝證汗下後表裏之病未解陰陽之氣兩虛仍宜兩解表裏藥宜輕而不宜重表之無過桂枝湯下之無過大柴胡湯

柴胡 芍藥 大黃 生薑 黃芩 半夏 枳實 大

棗  
陽虛如神倦脣白等證陰虛如煩渴等證若現大虛證須認定其陰陽而加以固陰固陽之品是在臨證時斟酌夫太陽之證何以用少陽之藥蓋以表之有傷乎陽不得再用表藥下之有傷乎陰不得再用陰藥此時惟有用兩解之法冀其微汗而解又因裏氣未和故少加大黃枳實以和胃非下之之謂也况少陽居於半表半裏之間以邪未盡而用下藥勢必引邪入裏適值於半表半裏之間矣用少

陽藥者以此

桂枝證汗下後陰陽兩停無有偏勝必視其陰陽之脈以何者爲虛虛者便是容邪之處若陽脈微者邪仍在陽位解之無過桂枝湯若陰脈微者邪則在陰位下之

宜調胃承氣湯大黃 芒硝 炙草

此係久病後汗下無他變證而其邪仍在者下之不得不異於初病故不用峻下之法

太陽經中篇凡寒傷營之證列於此篇

太陽經病發熱惡寒身體沉重惡風無汗脈陰陽俱緊者名曰傷寒麻黃湯麻黃 杏

仁 桂枝 炙草 主之

凡後言傷寒皆指發熱惡寒身體沉重惡風無汗脈陰陽俱緊而言

傷寒一日太陽受之與中風者無異但風則傷衛寒則傷營兩不相同中風者宜解肌傷寒者宜發汗所以桂枝湯主解肌麻黃湯主發汗爲中風傷寒之成方誠

天造地設莫之能改矣以桂枝麻黃爲中風傷寒之君藥故以名湯餘則皆爲佐使然相輔而行不可缺一如桂枝湯用芍藥以守內爲杜邪入裏用甘草以和中爲協理陰陽用薑棗以和胃爲建立中州古人立一方必有一方之用下一藥必有一藥之用故業醫者必須識立方之妙而後始能用藥如用兵招之卽來揮之卽去權自我操有響必應否則操縱不能自如矣其麻黃湯用桂枝以和衛亦如桂枝湯之用芍藥以守內用杏仁以泄肺亦如桂枝湯之用生薑以驅邪皆有以助桂枝麻黃之力至於甘草則同一協和之道而已矣其意衛病重在和裏營病重在達表觀於風傷衛之證而用桂枝血分之藥寒傷營之證而用麻黃氣分之藥可知之矣

太陽經傷寒脈本浮緊今但浮而不緊仍宜麻黃湯以發汗以脈浮亦傷於寒不必定見緊脈而後用之

太陽經傷寒脈本浮緊今浮而數爲有欲傳經之勢但尙未傳經仍宜麻黃湯以發



汗

太陽經傷寒心煩目暝如是者必衄宜麻黃湯以發汗則愈

太陽經傷寒十日外脈浮而細爲表邪已解若第浮者仍與麻黃湯以發汗設見胸

滿脅痛之少陽證當用小柴胡湯柴胡 半夏 人參 炙草 黃芩 生薑 大棗 以提

之

太陽經傷寒理當發汗乃有不可汗者淋家不可發汗以素來膀胱熱閉一旦迫之

使出則膀胱愈擾小便必下血

太陽經傷寒理當發汗乃有不可汗者瘡家不可發汗以肌表素虛陰氣暗耗發汗

後外風易襲必頭項強手足張而爲痙病

太陽經傷寒理當發汗乃有不可汗者亡血家不可發汗以陰虛而陽易孤若一發

汗陽從汗越必寒慄而振陰陽兩竭而莫救

太陽經傷寒理當發汗乃有不可汗者衄血家不可發汗以清陽之氣素傷汗出則

上焦枯竭必額上陷筋脈緊急陶目不得眠

此條與上數條心煩目瞑必衄者有異彼乃欲衄未衄此則已衄故治法不同

太陽經傷寒本當發汗設尺脈遲且微者其營分素來不足或爲誤下所致當先固其本不可驟然發汗先服小建中湯桂枝炙草 生薑 芍藥 大棗 飴糖使尺中之脈不遲微然後再行發汗則愈

建中湯卽桂枝湯倍芍藥加飴糖也但桂枝湯芍藥與桂枝等分用以和營衛此則倍芍藥乃所以固陰一方中分量有異其治法卽不同如此

太陽經傷寒二三日陽虛而心悸陰虛而心煩者爲有欲傳經之勢宜服小建中湯先建其中卽使傳經亦易於愈

太陽經傷寒發汗後半日許復又發熱惡風此汗後表虛外風襲入不得再行發汗

宜桂枝湯桂枝炙草 大棗 芍藥 生薑以和解

太陽經傷寒發汗後心煩而小便短赤者爲表裏俱有熱邪五苓散桂枝豬苓 白朮